

Ч. 47. (82.) Крыница, четверг дня 12. грудня (29. листопада) 1935. Рок II.



Орган Лемковского Союза.

Выходит в каждый четверг.

Редакция и администрация в Крынице. — Адрес „Лемко” Крыница.

Всіх читателєй, котры не вплатали ище пренумераты, просиме выровнати якнайскорше рахунки.

Также просиме присылати членскы вкладки до Лемко-Союза.

Кто хоче достати иллюстрованый Календар „Лемка” на 1936-ый рок, нехай присылат якнайскорше гроши.

Ціна одного календара выносит **50 гр.** При замовленьях 10 календарей покрыват редакция оплату почтову.

Обниженє цін артыкулов першой потреби.

Теперешне правительство стремит до уздоровленя и оживленя господарчого житя и роботы тоты посувають ся скоро наперед. Правительство забрало ся особенно остро до товаров скартелизованных, бо тоты товары были найдорозши.

В „Дневнику Законов” с дня 28 листопада т. р. появил ся декрет Президента Р. П., котрый змінят дотеперешный закон о картелях. Давнійше было так, што если якыйси картель провадил шкодливу и неучтиву господарку, то министр торговлі и промысла мог его діятельность приостановити и поставити внесенє о розвязанє, але рішал о том специальный суд картельный и ціле того поступованє могло тревати дост долго.

З ведены тепер зміны дают министрови торговлі и промысла большу силу. Если он переконат ся о шкодливой господарці якогоси картеля, має право розвязати его безотложно. Покривджены картелі можуть ся отликати до картельного суда. Понадто заострено значно кары за выполнєнє тых договоров картельных, котры были министром розвязаны.

Операючи ся на зміненом картельном законі, правительство розвязало уж 44 картелі, котры господарчо были шкодливы, бо вplyвали на звышку цін товаров фабричных. Сут то переважно картелі гуртовников, котры посередничили медже продукцентом (фабрикантом) и консументом (покупателем).

Кромі того будут ище розвязаны други картелі и то всі тоты, котрых діятельность ест узнана за шкодливу и перешкаджаючу в акции обниженя цін промысловых. Численны картелі не допускают до того, штобы товары фабричны доходили до покупателя по цінах обниженных.

Пробы обниженя цін виробов промысло-

вых (нпр. нафты и желіза) встрічали ся все с упорством картелей и приносили селу барз малу користь. Обнижено нпр. ціну желіза о 100%, але одночасно не подешевіли виробы вырабяны с желіза, як гвозді, вилы, лопаты, дрот и т. д., бо зыск с обниженя ціны желіза тягнули до своєї кышені розличны картелі гуртовников, занимаючих ся продажом, а хлоп мусіл платити по давному.

Для села передовсем мают велике значенє ціны нафты и желіза и правительство стремит до обниженя цін именно тых виробов.

Ходит также о того, же если товар ест дешевший, то купує его больше людей, треба однак продукувити его больше. Росне через того продукция, люды находят затрудненє и маліє число безработных.

Як шкодливы сут дакотры гуртовны картелі, свідчит факт, же нпр. при желізі ціна фабрична от ціны продажной по skleпах ріжнит ся о 200%, то значит, же люды платят праві три раз таку ціну, яка ест в фабрыках. Ріжница тых цін остає в кышенях картелей. Сут то ненормальны отношеня, котры вымагают уздоровленя безотложного, тым больше, же рынок заграничный корчит ся и лишат ся лєм невыкорыстаный належито рынок внутренний, краєвый. Тот рынок можна мати лєм при низких цінах, приміненых до средств населєня. Здобытє внутреннего рынка даст краєвому промыслови потребный збыт, без котрого промысл не лєм не буде мочи розвинути ся национально, але буде zagrożеный.

Здобытє внутреннего рынка означат заспокоєнє пекучих потреб широких мас населєня и запевненя им отвітной житевой стопы.

Понеже правительство выходит с того основаня, же треба начати от тых складочных частей, котры сут оснoвом всякой каль-

куляции, приступило найперше до урегульованя цін основных артыкулов скартелизованных, а именно: угля, желіза, нафты, текстилии и паперу.

В ділі обнижки цін тых товаров, результаты представляют ся так:

Цукор

має коштовати на терені цілої Державы по 1 зл. за 1 кг.

Нафта

подешевіє о 4 гроши на 1 литрі.

Угель

Ціна угля опалового ест обнижена о 130%, але при углю обнижено также тарифу желізнодорожну, в виду чого угель подешевіє о 20%.

Желізо

подешевіє о 100%, а тепер о 150%.

Обнижка

тых товаров обовязує от 1 грудня т. р.

В найблизшом часі має подешевіти также соль о 15 до 20 процент.

С фронту италиянско-абисынского.

За остатну неділю ишли на всіх фронтах завзяты бои, в котрых абисынчики выперают италиянов. По вістям с Аддис Абебы на полудневом фронті

абисынскы войска под начальством раса Насибу идут вперед с быстротом 30 километров в день.

На полудне от Горахаи росограла ся завзята битва, в часі котрой италиянскы войска пробовали взяти знова Горахаи, але безуспішно. Таки же завзяты бои росограла ся в реїоні ріки Веби-Шебели, на территории италиянского Сомали, где абисынскы войска мали заняти місцевость Амара. Газеты доносят, што италиянскы войска потерпіли великы страты не лєм в людях, але

и в военных материялах. Абисынчики маю́т уж 12 итальянских танков и войска абисынски маю́т уж ручны и машинны карабины, забраны итальянам. В окрузі Тембиен абисынчики напали несподівано на три транспорты с амунициом и провиантом и забрали в́сьо.

Положенє итальянской армии ген. Грациани має быти барз тяжке. Итальяны маю́т запас бензыны лем на дві неділі. Если не достанут свіжих транспортов, то их самолеты и моторызованы отділы будут парализованы.

В послідных днях кружат в́істи, же в Парыжі бесідуют о заперестаню боев в Африці на 3 тыждні. Через тот час не обовязовал бы выданный уж заказ вывозити нафту до Италии.

Италии потребна дозаріза нафта, то она згодила бы ся на то, але Абисыния на такой перерві могла бы дуже втратити.



Новый Воєвода Краковский.

Дня 3. грудня приіхал до Кракова новый Воєвода Краковский, д-р Казимір Свитальский. Нового воєводу повитали на желдор. дворці представителі властей и населения краковского с вицевоєводитом д-ром Малашинским во главі.

Воєвода Д-р Казимір Свитальский уродил ся в р. 1884. в Сяноці, где ходил до школы. Погодивше посвятил ся педагогичному званю. С выбухом войны в р. 1914-м Д-р Свитальский вступує, яко офицер до 1-шой б́ригады Легионов польских. По

одержаню независимости Д-р Свитальский єст начальником адютантуры Начальника Державы, Маршала Пилсудского, занимаючи тот постерунок аж до часу уступлення Маршала Пилсудского со становиска Начальника Державы.

По маєвом перевороті в р. 1926-ом обнимат руководство департамента политычного в Министерстві Внутренних Діл. В червні 1928 р. в кабинеті премиєра Бартля обнял теку министра Віроисповіданя и Просв. В квітні 1929. был премиєром. В р. 1930-ом был выбранный маршалом Сейма, а в теперешном Сенаті вицемаршалом Сената.



Итальяны воюют с крокодылями.

Кромі ріжных других перешкод тереновых и климатычных италянскы войска находят ище одну, а именно величезны травы, котры там вырастают до 4 м. высоко.

Передом там дораз по дожджевом часі палено тоты травы, але в том року правительство абисынске выдало заказ паленя трав, бо тот трава утруднят посуванє ся италянских войск.

Италянны запалют травы с самолетов, але по загаленю, (што удає ся не все) груба верства попелу утруднят свободу руху отділов войсковых. Друга непредвиджена перешкода, то дикы звіры. В такой н. пр. долині рікы Сетит (фронт полночно-западный) роит ся просто от дикых звірей всяких гатунков. В ріці той, котрой шири-

на по часі дожджей выносит парусот метров, жеє моц величезных крокодылей. До той самой рікы приходят пити воду цілы стада других хыщних звірей. Львы, слоні, лямпарты, носорогы и малпы, крыючи ся днем в величезных лісах, по западі сонца, выходят со своих хованок и гонят ку ріці, штобы заспокоити жажду.

Отділы италянскы, котры хотіли перейти через ріку Сетит, надыбали величезны кырделі крокодылей, с котрыма мусіли провадити формальну битву, треваючу цілу ноч. Стріляно с карабинов и легких армат, але через ріку не перешли.



ЦИ ЗАМОВИЛИ ВЫ УЖ
КАЛЕНДАР

ЛЕМКА

на 1936 рок?

ЕСЛИ НІ, ТО ЗРОБТЕ ТОТО,
ЯК НАЙСКОРШЕ!

КАЛЕНДАР КОШТУЄ ЛЕМ ВСЬОГО

50 грошей.

Стан овчарства в повіті ново-сандецком.

(Продолженє)

Загальне число овец, находячих ся в гніздах выносит 106 штук, в том числі 77 чорных и 29 білых. Гнізда тоты розміщено в 11-ох селах. Овцы до гнізд дано на слідуючих условиях: 1) господар, котрый достал овцы, обовязал ся выховати их рационально держати ся всяких поручень и рад фаховых органов Краковской Палаты Рольной и Окр. Т-ва Рольн. 2) покрывати свои овцы лем лиценционованым трыком. 3) увеличити свою овчарню до 3-ох літ до дво-кратного числа одержаных штук и 4) в часі до 3-ох літ отдати одержане число овец с прихованого наслідства. По выполнению тых условий, гніздо переходит на власность господара.

Если ходит о поправу породы (гатунку, расы) овец при масовом хові, то одном с найважніших квестий єст добор отвітного мужеского материяля расплодного. Перед начатєм пляновой акции в области овчарства, господары без жадного добору употребляли трыкы до покрываня своих и чужих овец. Трыкы тоты не представляли жадной вартости под взглядом расовым и ужитковым, бо походили звычайно с весняных окотов и были уж в осени употребляны до покрываня овец, а перед зимом уж их продавано. Ховати трыка 2—4 літ никто не хотіл. Звычай тот тепер змінил ся, бо каждый господар ховат днеска радо доброго трыка 2, а часом аж и 5 літ, бо сам переконал ся, же по старших трыках єст ліпше потомство. Штобы улегчити господарам возможность покрывати овец добрыма трыками, закупує ся каждого року отвітне число трыков, котры розміщат ся в тых селах, где веде ся плянову овчарску роботу. В р. 1935. куплено с фондов Пов. Выділа, Крак. Палаты Рольной и О. Т. Р. 21 штук трыков, в том числі 10 штук чорных и 11 штук білых, убагородненных фрызійском расом. В р. 1933. куплено 10 трыков, а в р. 1934. 14 штук, так, же тепер єст их на терені повіта 54 штук, котры розміщено в 27 селах. С сел лемковских находят ся лиценционованы трыкы в селах: Богуша, Мохначка Выжна, Мушинка, Лєлюхов, Щавник, Верхомля Велика и Милик. Тоты трыкы сут власностьом Палаты Рольной. Кромі того єст на терені повіта 98 трыков, заквалифкованых до годовлі, котры сут прыватном власностьом господарей. Принимаючи на 1 трыка 50—60 овец, то одержиме число 9000 штук овец, котре може быти покрывте отвітныма трыками. Понеже стан овец в пов. ново-сандецком выносит около 10000 штук, прото маме 90 процент потребных трыков.

С акциом поднесеня породы и числа овец мусит ити в парі акция над сорганизованєм збыта овечих продуктов, бо иначе хованє овец не оплачало бы ся. Мин. Рольн. и Реф. Рольн. и Министерство Войны выдали зарядженя в ділі купна мяса, волны и брындзы. Тож ходит лем о сорганизованє продажи так, штобы господар, а не посередник мал с того доходы. Початок в той справі єст уж зроблений. В минушом року О. Т. Р. выслало пробны партии волны до фабрык и заняло ся доставом мяса для войска. Подписано договор на доставу баранины для Гарнизона—Новый Санч. Потребне количество достарчано што 5 дней в часі от 15-го жолтня до конца грудня. В року текучом О. Т. Р. ново-сандецке дає уж мясо 4-ом Гарнизонам и то [от 15 вересня до конца січня. Материял мясной, а то скопы и овцы (трыков не купує ся, бо мясо с них не може быти через войско ужите) купує ся на нарочно сорганизованных згонах овец в поодыноких пуктах повіта. Штуку купує ся не „наоко“, але на вагу. На жолтень ціна єст низша, на листопад высша, а найвысша на грудень и січень (по 50 до 55 гр. за 1 кг. живой вагы). Каждый господар, записанный до Кружка Разводителей Овец може выпродати всі штуку, котры были в годовлі выбракованы и уж знає наперед, яку ціну достане. Понеже в том року понад 1000 штук закупит ся для войска, прото и ціны рыноковы значне ся поднесли. За штуку, за котры перед роком плачено по 9 до 10 зл., платит ся тепер по 15 — 17 зл., а сут и такы, за котры ся бере по 30 — 35 зл.

Кромі организации збыта мяса и волны, котрой в р. 1935. выслао 400 кг., организує ся курсы трыкотарскы и ткацкы, курсы выправы скор и крою и шитя кожухов. В зимі 1934/35. переведено в 3-ох селах курсы трыкотарскы для дівчат 1 курс фабрыкованя волняной пряджи, 1 курс выправы скор и 1 курс крою и шитя кожухов. Курсы трыкотарскы, с котрых каждый тревал по 4 неділі окончило 125 курсанток, курс фарбярский 32, а курс выправы скор 23-курсантов.

В теперешных трудных условиях труда и господаркы веде ся пляново акцию в напрямі поднесеня одной важной галузи звірячой продукции, яком єст годовля овец, котра приносить великы користи. Започатковане розвїте домашного промысла може дати селянам дальши доходы, котры позволят неодной родині покрити нима конечно потребны выдаткы.

Дяковська школа на Лемковщині.

В жолтні т. р. основано в Вороблику Королевском коло Рыманова Дяковську школу, до котрой на разі прийнято 8. воспитанників. В школі той преподають ся такы предметы: Закон Божий, история церкви, история Руси, русский язык, церковно-славянский язык, литургика, теория співу, ирмологион, устав церковный, рахункы, о добром поведенью, о кооперації, о господарстві, о веденью хорів и читалень, о організації села и т. д. Крім тих наук воспитанники вчат ся переплітати книги (интролигаторство), фотографувати и шити. Преподавателями назначено: о. Иоана Полянського, о. Николая Головача, г. Стефана Барну, г. Осифа Енкалу, г. Романа Барну и г. Стефану Пильха. Наука и мешканє бесплатно. На удержанє префекта 5 зл. місячно. Наука буде тревати 2 роки, а по двох роках состоит ся экзамен. Дякы, вышедши с той школы, будут мати першенство перед другима на посады на Лемковщині.

Ставропигийский Институт во Львові перший пришол с матеріальном помочом для той школы в формі подарованя знач-

ного числа церковных книг.

Школа Дяковська в Вороблику даст кандыдатам на дяков загальне образование и отвітно подготєвит их до организационной працы на Лемковщині, длятого лемкы повинны нъом веще заинтересовати ся и не до Перемышля, а до Вороблика давати своих хлопцов на науку дяковства. Украинцы вшиткыма способами старали ся недопустити до отвореня той школы и много кандыдатов от ней отстрашили, а газ. „Наш Лемко“ в ордынарный способ выступила против той школы, однак мимо тех перешкод школу отворено и она прехорошо розвиват ся и даст Бог, што с той школы выйдут добры труженники на ниві церковной, народной и экономичной на Лемковщині.

Стефан Пильх
префект Д. Ш.

Правленє Дяковской Школы в Вороблику королевс. складат посредством нашей редакции сердечно благодаренє Сениору Ставропигийского Института многоу.в. Г-ну Антонию Гулли во Львові за княжий дар в формі церковных книг на річ Дяковской Школы.



Дяковский курс в Вороблику Королевском. Сідыт в першом ряді от ліва в право:

Роман Барна, Стефан Барна, о. Ник. Головач, катех., О. Канцлер-И. Полянський, Осиф Енкала и Стефан Пильх—учителі Дяк. Шк.

Стоят кандыдаты надяков

ДЛЯ РУССКОЙ БУРСЫ В ГОРЛИЦАХ.

Дня 20 листопада т. р. Ексц. Апостольский Администратор, о. др. В. Масцох в переїзді через Горлицы вступил до нашей бурсы. Владыка огланул поміщенє, интересовал ся жисьом воспитанников, их науком и ділами бурсы. Отїзджаючи зложил 50 зл., яко „бандурку“ от себе для бурсы.

За тот щедры дар Выділ бурсы складат Ексцеленции свою глубоко и сердечну благодарность.

На возванє Выділа жертвовати провизанты для бурсы откликнулись ся в дальшом тягу слідуючи села горлицкого повіта: 1) Сквиртне — кооп. „Самопомощ“ дал фуру дерева опалового; 2) Новица — прислала фуру картофель и капусту. Сбором там занимал ся г. Осиф Ференц, а отвозом до Горлиц г. Ст. Галушак и г. Ст. Клянцко; 3) Смерековец — фуру каргофель, капусту, дерево опал. и дошки. Отвозом занял ся г. С. Пыртей.

От Общества Руских Братств в Амерыці одержано 46:50 ам. дол., яко збор на 17 конвенции членов Братства на предложєнє г. Георгия Млынара. От г. Михаила Дычкевича с Лос-Исланд (Амерыка) одержано посредством газ. „Земля и Воля“, собраны ним 5 ам. дол. Русский

Благотвор. Комитет в Дубні прислал 25 зл. и г. Влад. Пьонтковский с Коростовы и Здолбункова — 10 зл.

Крім того интеллигенция горлицкого, сандецького и по части других повітов обложила ся добровольно місячныма пожертвованьями в висоті от 1—3 зл., котры вплачуют точно до касы бурсы. Подробный спис их буде оголошеный погодивше.

Вшиткым ту вычисленым жертводателям и потрудившим ся коло збора — Выділ Руской Бурсы в Горлицах складат сердечно и горяче „Бог заплат“!

Дай Вам Господь, чтобы „рука дающего не ускуділа“!

Выділ бурсы.

ЗМІНА ИНВАЛИДСКОГО ЗАКОНА.

В Дневнику Законов Р. П. с дня 24. листопада 1935. Нр. 85. поз. 522. был оголошеный декрет Президента Р. П., котрый змянят основно приписы арт. 7. закона (Дн. З. Р. П. с 1935 р. Нр. 5. поз. 31) в тот способ, же „инвалид не може жадати поновного усталєня степени утраты заробковой способности, або загальной утраты способности заробковой, если то усталєнє было признане на стало правосильным оречєнєм“.

В виду повысшого декрета инвалид, посідающий инвалидскы права, признаны на стало, не може быти представленый тепер инвалидской комиссии ревизийно-лицкарской по поводу погоршеня ся стану здравя, то ест в послідстві так званой „скарғы на погоршенє хвороты“.

БЛАГОДАРЕНЄ.

Сердечно дякуєме нашим рускым интеллигентам, котры не пожаловали труда и гроша и прибыли на наше аматорске представлєнє, дня 24. листопада 1935. а именно: д-ру Яр. Сьокалі, проф. Максимовичу, О. Вас. Люткевичу, О. Герасимову, Ник. Юрковскому, Борису С., Иоанні Вислоцкой, Ив. Дуркоту, Т. Ядловскому и Гвижджу.

Правленє Чит. им. Качк. в Баниці пов. Горлицы.

В четверг, дня 19. грудня 1935. о год. 2-гой в Баниці, в дому М. Косара отбуде ся

Обще Собранє
ЧЛЕНОВ ЧИТ. ИМ. М. КАЧКОВСКОГО,
на котре запрашат ся всіх членов.
Буде принимати ся также новых членов.
Правленє Чит. им. М. Качковского
в Баниці пов. Горлицы.

РОДНА СТОРОНА.

Красна ест моя родна сторона,
Хоц всі ю ганят, похваля ю я,
Люблю ю дуже, хоц бідна она,
Горы, каміне..., но родна моя!

Говорю „моя“, бо я ту родил ся,
Ту жил мой няньо, а также мой дід.
И я ту вырос, уж и постаріл ся,
Но луже людей пошло от нас в світ.

Пошли глядати счастья за море,
Но многы, многы уж ся вернули,
Хоц не зазнали біды, ни горя,
Хоц им весело там житє плыло...

Рыба не може жити без воды,
Лемко не може жити без гор,
Хоц мал бы в світі ліпши выгоды,
Но волит в дома овсяный чир.

Бо Лемко любит лісы и горы
И свіжий воздух и зимну воду,
Земля му вродит дакус комперей
И дакус овса, — не вмре с голоду.

Тож жаден лемко не замінит горы
Хоц бы за який красны чорнозем,
Ни чуждой віры не прийме николи,
Мы лемкы рускы! Рускыма помрем!

Демко Флорынчан.

КОМУНИКАТ.

В звязи с tym, же многым посідачам позволєня на оружіє кончит ся термин важности дня 31 грудня 1935. Староство Повітєве Ново-Сандецке пригадує, же людя, котры не внесут поданя до Староства о продолженє позволєнь на оружіє перед термином их важности, позволєня тоты не будут продолжены, а крім того особы тоты будут укараны за неправе посіданє и ношенє оружія, а само оружіє подпаде занятю, як того мало місце в многых случаях того року.

Прото для власного добра, посідачи позволєнь на оружіє повинны перестерігати обовязуючи приписы.

Староста: Д-р Лах в. р.

Што чути в світі.

Відень: Віденські газети доносять, же в найближчих днях має приїхати японська делегація для пертракції в ділі заключення договору японсько-німецького.

Берлін: В Німеччині оголошено закон, в силу якого жиди, цигани і мурины, яко раса, котрой кров єст гатунково чужа кърви німецькой, не будут могли одержати німецьке гражданство.

Атени: По повороті до Греції король Юрій підписал 2 декрети амнестийны, в силу котрых всі преступники политычны были помилованы. Амнестия обняла Венизельоса і всіх войсковых. Всі обняты амнестией и помилованы были безотложно выпущены на свободу. Также цофнено конфиску маєтков. За участь в мартовій револуції было засуджених 578 людей.

Прага: В виду охоты уступленя с постерунка президента державы Масарыка большинство партий выказало ся за тым, же найотвітнійшим кандыдатом на президента являт ся министр заграничных діл д-р Бенеш. В том случаю министром заграничных діл выбрано бы наскорше д-ра Крофту.

Льондон: Агенция Рейтера доносит с Египта, же на случаі италянського напада от стороны Либии, италянські войска натрафили бы на 300 тысяч вооружених арабов на верблюдах и густу сіль уфортыфікованих постерунков, маючих войска англицы и арабскы.

Льондон: На побережу полнотной Шкоции (Шотландия) в Англии збурене море вышмарило на берег околo 60 великих оказов кита.

Льондон: Наглый приїзд короля бельгійского Леопольда II. до Льондона пояснят ся ту, яко охоту посередництва медже Италиом и Абисыниом в звязи с заостренным положенєм остатных дней.

Рим: На порученє Муссолиного всі желізни огороженя с публичных и прыватных парков и улиц в цілої Италиі суг зняты и перезначены на цілі воєнны.

Атени: Ген. Кондилис, бывший регент Греції сорганизовал перед королевским дворцом величезну манифестацию, протестуючу против декретам о амнестии. В звязи с тым король Юрій загрозил, же зрече ся престола и выїде безотложно с Греції.

Амстердам: Жиючий от часу оконченья світової войны в голендерской місцевости Доорн бывший цисар Вильгельм II. занедужал тяжко. Стан его здоровья має быти безнадійний.

Рыга: Писмо „Наша Річ“ доносит, же на воєнній раді в Москві на Кремлі маршал Блихер зложил справозданє с положенья на Далеком Выході. Заявил он, же на суші и на морі совітскы силы суг значно меньши от японских. Совіты перевысшают лем японцов в летунстві. Сил морских Совіты на Далеком Выході праві не маюат. Блихер думаєт, однак, же до войны медже Совітами и Японией не дойде, бо Япония єст тепер заангажована в Кытаю.

Білград: По поводу 17 рочницы сполученья Югославии оголошено амнестией, в резултьаті котрой 15.000-ам люда буде дарована цілковито, або частинно кара.

В Ленинграді (Петроград) выкрыто естонску организацию шпйонску. Проводыра той организации естонца, Кивисяка, убито в часі арестованя. Организация тотя зберала вісти, относячи ся до сил оружных совітской армии в околиці Ленинграда.

Вісти с краю.

Варшава: Рада Министров приняла проект декрета о обниженю оплат комунальных и так: арт. 1. того декрета зносит право самоуправных союзом до побераня оплат шлябантных и мостовых на дорогах публичных, оплат так званих „копытковых“, рогатковых при вїзді до міст и постоевых на дорогах и публичных площах. Приписы тоты не относятся ся до влат побераних за уживанє уряджених торговиск.

Варшава: Дня 3-го грудня Президент Річи Посп. підписал номинацию проф. Войтіха Свентославского на Министра Віроисповіданя и Просвіщеня. Новый министр єст професором варшавской политехники.

Варшава: Дня 16. грудня на консысторі тайном в Ватыкані наступит поднесенє через римского папу нунция Мармаджи до рангы кардинальскої. П. Президент Р. П. вручит в Варшаві на замку нунцию кардинальскій капелюш.

Варшава: П. Президент Р. П. поручил зменьшати свои поборы о суму 60 тысяч злотых рочно, аджек о 5 тысячей зл. місячно на рок 1936/37.

Варшава: Новый бюджет предвиджат увеличенє числа народных школ с 25.261 на 25.744 т. є. о близко 500 новых школ.

Варшава: Правительствоны круги поробили зарядженья, штобы ширши круги населеня отчули знижку цін и штобы фабричны товары доставали ся консументам по знижених цінах. Контроля над цінами товаров фабричных буде сконцентрирована в Министерстві Промысла и Торговлі. В Варшаві буде уважати на ціны Комисар Правит., а на провинции воеводы и старосты.

Варшава: Мин. Промысла и Торговлі д-р Р. Горецкий підписал дня 4. грудня зарядженє о розвязаню 44 картелей, в том числі передовсем картелі торговельны и промысловы с группы нафтяной, металевої; желізной и паперовой.

КТО ХОЧЕ ЗАБЕЗПЕЧИТИ СЯ
НА СТАРОСТЬ, АБО ЗЛОЖИТИ ДІТЯМ
ПРИДАНЕ, НАЙ

заасекурує ся
в Асек. Товаристві
Вита и Краковске
во Львові

Варшава: В коротком часі укаже ся зарядженз, в силу котрого всі skleпы в цілої державі будут отворены до год. 9. вечером.

Варшава: От 15-го грудня подешевіє нафта о 4 гроши на литрі. Также понижено ціну угля о 1800. Оголошено новы ціны цукру. Кильо кристала коштує 1 зл. пило-ваной косткы 1'50 зл., а косткы прасованой и пудру 1'35 зл.

Варшава: Дня 5 грудня собрал ся Сейм и Сенат на звычайну сесию бюджетну.

Варшава: Декрет Президента усталаят высоту правных процентов от позичених грошей на 800 рочно. До тепер высота процентов выносила 1000.

Новый Санч: Полиция выкрыла тайну го-рельню, котра містила ся на цэентері в Лонцу. Помысловым фабрикантом был гробар Андрей Кутва, а помагал єму Петро Токарж. Цілу апаратуру до výroба спирта забрано, а „фабрикантов“ отдано судовой.

Тарнов: Дня 1. т. м. вечером доконано бандытского нападу на лат. плебанию в Щепановицах под Тарновом. Два бандыты револьверами стерорызовали пароха ксєндза Яна Войтановского и забрали єму 500 зл. готовыма грошми, револьвер и два фльо-берты. Поза тым не вырядили „ксєндзу“ жадной кривды и отышли спокойно. Полиция натрафила уж на слід преступников.

Богатый дзяд: В Отвоцку под Варшавом помер старый дзяд, котрый мал уж 101. літ. Он Оставил 4-ом сынам и 11-ом внукам наслідство 100 тысяч готовыма грошми и ка-меницу в Варшаві. Видно же и дакотрым дзядям поводит ся не зле.

В ЗИМІ ОТБУДЕ СЯ В КРЫНИЦІ СЕЛІ

курс ткацкий

Оплата за науку на курсі выносит 2 зл. Участники курсу не достаюат поміщеня и удержаня. Курсанты мусят пригото-вити льняну, або волняну пряджу. Мусят они обовязати ся перестерігати рыгор школьный. Зголошеня принимат администрация газеты Лемко в Крыниці.

Дня 22. грудня т. р. о год. 10-той
отбуде ся
в Горлицах в поміщеню Руской Бурсы

Обще собранє Членов Лемко-Союза.

Програма дня слідуюча:

- 1) Открытие Собраня и выбор презыдиди на час Собраня.
- 2) Доклад с діятельности правленя за рок 1935.
- 3) Доклад касовый.
- 4) Уділенє абсолютории.
- 5) Дополнителный выбор правленя.
- 6) Выбор Контрольной Комисии.
- 7) Обсудженє религийных діл в звязи з назначенєм Апостольского Администратора.
- 8) Обсудженє школьных діл.
- 9) Уложенє програмы работы на рок 1936.

Просиме приняти в собраню численну участь.

Правленє.